

**Protocol radunonza generala da Trun Turissem  
venderdis, ils 21 da mars 2025 allas 19.30 uras  
el Centro**

**Gliesta da tractandas:**

1. Beinvegni ed appell
2. Elecziun da dus dumbravuschs
3. Approbaziun dil protocol dils 15-03-2024
4. Rapport dil president
5. Quen annual 2024
  - a) presentaziun
  - b) rapport da revisiun ed approbaziun
6. Preventiv 2025
7. Fixar la contribuziun dallas commembras e dils commembers
8. Varia

Annina Tomaschett, tiradura da sport dil cader naziunal, dat als presents in sguard en siu mintgadi sportiv e stat a disposiziun per damondas.

**1. Beinvegni ed appel**

President Daniel fa a tuts presents in cordial beinvegni.

Sco appel cursescha la gliesta da preschientscha

Presents ein 22 commembers/ras. Las perstgisas vegnan prelegidas.

Il president suplichescha per in cuort mument da silenzi per nies commember defunct Albert Decurtins. El ei staus in grond promotur per la cultura ed era per il sport en vischnaunca. Buca d'emblidar siu nunstunclenteivel engaschi sco organist dalla pleiv da Trun sur biars decennis.

**2. Elecziun da dus dumbravuschs**

Sco dumbravuschs vegnan Aluis Tambornino ed Olivia Pfister elegi unanimamein.

**3. Approbaziun dil protocol**

Il protocol dalla davosa radunonza generala dils 15-03-2024 ei staus puplicaus sin la pagina dalla vischnaunca. Sin giavisch eis el vegnius tarmess tier. Negin ha fatg diever da tal survetsch.

Ils presents approbeschan il protocol cun admetter in engraziament per la redacziun da tal.

#### **4. Rapport dil president**

Ils ins fan bugen sport, auters gaudan bugen la natira ed aunc auters muossan pli bia interess per la historia e cultura. Quei vala en spezial per Trun. La presenza els mieds da massa durant igl onn vargau ei stada immens gronda ed ei aschia per la vischnaunca e per il turissem nunpagabla.

La fiasta da giubileum da 600 onns Ligia Grischa cun tut las occurrenzas leutier vegnan a restar a nus aunc ditg en buna memoria. Ins astga bein numnar las principalas:

- La Ligia Grischa sin viadi historic
- Détgas e fatgas d'ina perdetga metta
- Sut igl Ischi, il teater

Tut ei stau producziuns bein gartegiadas ed en num da Trun Turissem in grond engraziament a tut tgi che ei sengaschau per il beingartegiar digl onn da fiasta 2024

Buca d'emblidar tut las autras uniuns e societads che prestan gronda lavur sin palancau cultural e sportiv. Exposiziuns ella Cuort Ligia Grischa, spazi d'art Matias Spescha, fiasta da cant districtuala, il success el sport da tir dils tiradurs dalla Voluntaria Trun, il runal La Péra, uniun da scursalets, club da ballapei, eav.

In grond engraziament era a Georg Cajacob per la preperaziun da nossa senda da spassegiar d'unviern.

La cunvegna che Trun Turissem ha cun Surselva Tourismus, cuosta a nus ina pulita summa, porta denton la pusseivladad da far reclama che TT savess buca pagar sulet. Las differentas brochuras che vegnan edidas da Surselva Tourismus ein in bien mied da recalma e nus essan presents empau dapertut.

Buca il davos aunc enqual plaid tier il Campadi. El ha fatschentau nus en bein enqual sesida da suprastonza.

La gronda summa dallas taxas che Trun Turissem sa incasssar, vegn dalla Campadi Oгна SA.

Perquei essan nus dalla suprastonza da Trun Turissem stai perschuadi che la cumpra entras la vischnaunca ei la megliera soluziun.

Era egl avegnir lein nus posiziunar nossa vischnaunca aschi bein sco pusseivel sin la carta turistica dalla Surselva, quei ei e resta il pensum principal da nossa iniun.

#### **5. Quen annual 2024**

##### **a) presentaziun**

Nossa cassiera Rita Wolf prelegia il beinmenau quen. El siara cun expensas da fr. 105'658.51 ed entradas da fr. 92'494.05. Aschia seresulta ina sperdita da fr. 13'164.46.

##### **b) rapport da revisiun ed approbaziun**

Demai che omisdus revisurs ein bu presents, prelegia president Daniel il rapport da revisiun e conferma che tuttas cudischaziuns e quittanzas seigien avon maun ed il quen seigi vegnius menaus a moda schubra e surveseivla.

Ils revisurs da quen engrazian alla suprastonza ed alla secretaria per la gronda lavur prestada en favur da Trun Turissem.

Ils presents dattan scarica alla suprastanza e cassiera ed approbeschan il quen annual 2024 unanimamein.

## 6. Preventiv 2025

La cassiera Rita presenta il preventiv pigl onn 2025.

Ins quenta cun entradas da fr 94'600.- ed expensas da fr.96'100.00. Aschia seresulta ina sperdita da fr.1500.-.

## 7. Fixar la contribuziun dils commembrers

La contribuziun munta per possessurs e menaders da menaschis da restauraziun e da pernotaziun, fatschentas ed interpresas en vischnaunca e personas singulas fr. 25.-.

Per fatschentas ed interpresas d'ordeifer munta la contribuziun fr. 50.-

La suprastanza ed ils revisurs proponan da schar las contribuziun sco tochen da cheu. La proposta vegn approbada unanimamein.

## 8. Varia

- Muort sia abdicaziun sco gerau da nossra vischnuanca, ei Erica Cavegn-Pfister buca pli part da nossra suprastanza. Daniel angrazia ad Erica per la gronda lavur en favur dil turissem. La collaboraziun cun ella ei adina stada fetg emperneivla e nuncumplicada. Erica vegn vinavon a star a disposiziun en differents gremis, oravontat stat la cultura ad ella a cor. Nus surdein ad Erica in present. President Daniel fa in cordial beinvegni alla nova geraua Silvana Menzli. Ella vegn el futur ad esser part dalla suprastanza da Trun Turissem.
  - Justina Simeon engrazia en num dalla Cuort Ligia Grischa pil sustegn oravontut per l'ediziun dil guid d'art che ha custau frs. 90'000.-  
Ella fa attents ils presents sin la proxima exposiziun che ha sia avertura ls 5-4-2025. Il museum ha vinavon endrizzau da niev differentas stanzas che ein oravontut adattadas per affons.
  - Gerau Lucas Arpagaus engrazia en num dalla suprastanza communal per tut la lavur prestada. Buca il davos per il sustegn en connex cun il Campadi Ogn.
  - President Daniel engrazia da sia vard per la buna collaboraziun en vischnaunca ed en spezial cun Albert Spescha. El ei premuraus dad ademplir tut aschi bein sco igl ei pousseivel.
  - Demai che negin auter giavischa il plaid, fa il president Daniel in cordial beinvegni a nies hosp da questa sera Annina Tomaschett. El gratulescha ad ella per la distincziun sco tiradura digl onn 2025, sco era per tut las autras prestaziuns. Annina ei nossra ambassadura ed ha aschia gia purtau il num Trun Turissem tochen ell'India, nua ch'ella ha sittau concurrenz.
- El dat il paid ad Annina.

Annina presenta siu mintgadi sco tiradura da professiun. Cun enqual fotografia muossa ella tgei che vegn tut pretendiu.

Il presents fan stedi diever dalla pusseivladad da tschentar damondas ed era da saver veser inaga tgei che sauda tut tier, vul dir: resti, buis, muniziun...

Annina engrazia a Trun Turissem per il generus sustegn dils davos onns e menziunescha dad esser fetg engrazievla persunter.

President Daniel engrazia a tuts per lur preschientscha e la buna discussiun e giavischa in bien appetit e silsunter in bien retuorn a casa.

Campliun, avrel 2025

il president  
Daniel Tuor

la secretaria  
Esther Tomaschett